

氏族典

氏族典第一百六十一卷

韓姓部列傳三

後梁 韓建

按五代史韓建傳建字佐時許州長社人也少爲蔡州軍校隸忠武軍將鹿晏弘從楊復光攻黃巢巢破復光亦死建乃以麾下兵西迎僖宗於蜀拜金吾衛將軍僖宗還長安建爲潼關防禦使華州刺史大順元年以兵屬張濬伐晉濬敗建自含山遯歸河中王重盈死諸子珂珙爭立晉人助珂建與王行瑜李茂貞助珙昭宗不許建等大怒以三鎮兵犯京師昭宗見建等責之行瑜茂貞惶恐戰汗不能語獨建前自陳述乃殺宰相韋昭度李磎等謀廢昭宗會晉舉兵且至建等懼乃還乾寧三年李茂貞復犯京師昭宗將奔太原次渭北建遣子允請幸華州昭宗又欲如鄜州建追及昭宗於富平泣曰藩臣偏疆非止茂貞若捨近畿而巡極塞乘輿渡河不可復矣昭宗遂幸華州是時天子孤弱獨有殿後軍及定州三都將李筠等兵千餘人爲衛以諸王將之建已得昭宗幸其鎮遂欲制之因請罷諸王將兵散去殿後諸軍累表不報昭宗登齊雲樓西北顧望京師作菩薩蠻詞三章以

思歸建心尤不悅乃率精兵數千圍行宮請誅李筠昭宗大懼遽詔斬筠悉散殿後及三都衛兵幽諸王於十六宅建復與中尉劉季述誣諸王謀反以兵圍十六宅諸王皆見殺建已殺諸王乃營南莊起樓閣欲邀昭宗遊幸因以廢之而立德王裕其父叔豐謂建曰汝陳許間一田夫爾遭時之亂蒙天子厚恩至此欲以兩州百里之地行大事覆族之禍吾不忍見不如先死因泣下獻欬建稍恐懼乃止光化元年昭宗還長安封建潁川郡王建辭王爵乃封建許國公梁太祖以兵嚮長安遣張存敬攻同州建判官司馬鄴以城降太祖使鄴召建建乃出降太祖表建平盧軍節度使太祖卽位拜司徒同中書門下平章事太祖郊於洛建爲大禮使罷相出鎮許州許州軍亂見殺年五十八

韓遜

按五代史韓遜傳遜不知其世家初爲靈武軍校當唐末之亂據有靈鹽唐卽以爲節度使而史失其錄不見其事梁開平三年封朔方節度使韓遜爲潁川王始見於史是時邠寧楊崇本鄜延李周彝鳳翔李茂貞皆與梁爭戰獨遜與夏州李思諫臣屬於梁未嘗以兵爭李茂貞嘗遣劉知俊攻遜不能克遜亦善撫其部部人皆愛之爲遜立生祠貞明中遜卒軍中立其子洙爲留後梁卽以爲節

度使至莊宗時又以洙兼河西節度天成四年洙卒卽以洙子澄爲朔方軍留後其將李賓作亂澄乃上章請師於朝明宗以康福爲朔方河西節度使以代澄由是命吏而相代矣韓氏自遜有靈武傳世皆無所稱述澄後不知其所終

韓昭

按萬姓統譜昭仕僞蜀王氏爲禮部尙書琴棋書筭皆涉獵李台瑁曰韓八座伎藝如拆襪線無一條長

後晉 韓熙載

按萬姓統譜熙載濰州北海人唐進士名聞京洛奔江南事李氏累官中書侍郎光政殿學士諡文靖熙載才氣俊逸善爲文素性高簡無所卑屈江左號爲韓夫子云

韓保貞

按十國春秋後蜀韓保貞字永吉潞州長子人父昭運從高祖入西川及高祖稱大號署珍州刺史保貞初事高祖爲押牙及登極以爲豐德庫使兼廣義庫使後主嗣位累遷眉州刺史樞密副使已

復爲漢州刺史拜宣徽北院使後主爲方士房中之術多採良家子充後宮保貞切諫後主大悟卽日出之賜保貞金數斤未幾鳳翔侯益歸款命保貞充北路行營都監以圖岐陽益中變保貞還成都俄爲雄武節度使領兵出新關至隴州漢兵固守保貞無功而還復屯雄武廣政十四年赴成都改寧江節度使李昊讓度支詔以保貞代之已又加宣徽南院使山南節度左衛聖步軍節度指揮使遷奉靈肅衛馬步軍都指揮使又選其子崇遂尙公主未幾荆南高繼冲納土于宋後主聞之詔保貞爲峽路都指揮制置使屯夔州以經畫邊事遷檢校太尉兼侍中已而聞宋舉兵以保貞爲山南節度使興元武定緣表諸砦屯駐都指揮使及王全斌至保貞棄興元保西縣宋師進圍之保貞懦弱不敢出遣人依山背城結陳以自固爲宋將史延德所破獨以麾下遯延德追擒之送王全斌驛置汴京宋太祖召升殿勞問賜袍笏金帶茵褥鞍勒馬仍賜甲第未及命官而保貞卒贈右千牛衛上將軍

韓保昇

按十國春秋後蜀韓保昇潞州長子人太尉保貞弟也廣政時積官至翰林學士博洽無所不窺尤

詳於名物之學後主命保昇取唐本草叅校增註爲圖經二十卷後主自爲製序謂之蜀本草

後周 韓通

按宋史韓通傳通并州太原人弱冠應募以勇力聞補騎軍隊長晉開運末漢祖建義於太原寘通帳下尋從漢祖至東京累遷爲軍校漢祖典衛兵以通爲衛隊副指揮使從討杜重威得銀青階檢校國子祭酒漢祖開國加檢校左僕射隱帝卽位遷奉國指揮使乾祐初周祖爲樞密使統兵伐河中知通謹厚命之自隨先登身被六創以功遷本軍都虞候周祖鎮大名奏通爲天雄軍馬步軍都校委以心腹及入汴通甚有力焉授奉國左第六軍都校領雷州刺史廣順初爲虎捷右廂都校遷左廂充孟州巡檢繼領永睦二州防禦使周祖親征兗州以通爲在京右廂都巡檢命浚汴口築河陰城剗營壁未幾拜保義軍節度觀察留後周祖親郊正授節度并州劉崇南侵命通擊之敗於高平以通爲太原北面行營部署爲地道攻其城俄班師移鎮曹州檢校太保顯德二年城李晏口爲靜安軍又城東鹿及鼓城并葺祈州又城博野又城百八橋鎮及武強縣皆旬日畢歸朝會攻秦鳳以通爲西南面行營馬步軍都虞候入大散關圍鳳州分兵城固鎮以斷蜀餉道未幾拔鳳州以功

授侍衛馬步軍都虞候世宗征淮南命通爲京城都巡檢世宗以都城狹小役畿甸民築新城又廣舊城街道通總領其役功未就世宗幸淮上留通爲在京內外都巡檢權點檢侍衛司三年改領忠武軍節度檢校太傅又改侍衛馬步軍都虞候世宗幸壽春爲京城內外都巡檢淮南平爲歸德軍節度六年春詔通河北按行河堤因發徐宿宋單等州民浚汴渠數百里世宗將北征命通與高懷德張鐸先赴滄州賜襲衣金帶鞍馬器帛卽領兵入契丹境乾寧軍之南俄爲陸路都部署殿前都虞候石守信副焉又命通巡北邊自浮陽至淤口浦壞坊三十六遂通瀛莫初克益津關以爲霸州役濱棣民數千城之命通董其役師還以爲檢校太尉同平章事充侍衛親軍馬步軍副都指揮使恭帝卽位移領鄆州太祖奉詔北征至陳橋爲諸軍推戴通在殿閣聞有變惶遽而歸軍校王彥昇遇通於路策馬逐之通馳入其第未及闔門爲彥昇所害妻子皆死太祖贈中書令以禮收葬通性剛而寡謀言多忤物肆威虐衆謂之韓瞠眼其子頗有智略幼病偃人目爲囊駝兒

遼 韓延徽

按遼史韓延徽傳延徽字藏明幽州安次人父夢殷累官薊儒順三州刺史延徽少英燕帥劉仁恭

奇之召爲幽都府文學平州錄事叅軍同馮道祇候院授幽州觀察度支使後守光爲帥延徽來聘太祖怒其不屈留之召與語合上意立命叅軍事居久之慨然懷其鄉里賦詩見意遂亡歸唐已而與他將王緘有隙懼及難乃省親幽州匿故人王德明舍德明問所適延徽曰吾將復走契丹旣至太祖大悅賜名曰匡列匡列遼言復來也卽命爲守政事令崇文館大學士中外事悉令叅決天贊四年從征渤海大譴讓乞降旣而復叛與諸將破其城以功拜左僕射太宗朝封魯國公仍爲政事令使晉還改南京三司使世宗朝遷南府宰相建政事省設張瑄具稱盡力更天祿三年六月河東使請行冊禮帝召延徽定其制應曆中致事九年卒年七十八贈尙書令

韓知古

按遼史韓知古傳知古薊州玉田人善謀有識量太祖平薊時知古爲淳欽皇后兄欲穩所得后來嬪知古從焉未得省見怏怏不得志挺身逃庸保以供資用其子匡嗣得親近太祖因間言太祖召見命叅謀議神冊初遙授彰武軍節度使總知漢兒司事兼主諸國禮儀頃之拜左僕射征渤海有功遷中書令天顯中卒子匡嗣

韓德樞

按遼史韓延徽傳延徽子德樞未冠守左羽林大將軍遷特進太尉授遼興軍節度使下車整紛剔蠹恩煦信孚勸農桑興教化期月民獲蘇息入爲南院宣徽使遙授天平軍節度使平灤營三州管内觀察處置等使門下平章事已而加開府儀同三司行侍中封趙國公保寧元年卒

韓匡嗣

按遼史韓知古傳知古子匡嗣以善醫直長樂宮皇后視之猶子應曆十年爲太祖廟詳穩後宋王喜隱謀叛辭引匡嗣上置不問初景宗在藩邸善匡嗣卽位拜上京留守保寧未以留守攝樞密使時宋人取太原乘勝逼燕匡嗣與沙惕隱休哥侵宋軍於滿城方陣宋人請降匡嗣欲納之俄而宋軍鼓譟匡嗣棄旗鼓遁軍還帝怒令誅之皇后引諸內戚徐爲開解上乃杖而免之旣而遙授晉昌軍節度使乾亨二年改西南面招討使卒後追贈尙書令五子德源德讓德威德崇德凝

韓紹勳

按遼史韓延徽傳延徽孫紹勳仕至東京戶部使會大延琳叛被執辭不屈賊以鋸解之憤罵至死

韓紹芳

按遼史韓延徽傳延徽孫紹芳重熙間參知政事加兼侍中時廷議征李元昊力諫不聽出爲廣德軍節度使聞敗嘔血卒

韓資讓

按遼史韓延徽傳延徽孫資讓壽隆初拜中書侍郎平章事會宋徽宗嗣位遣使來報有司按籍有登寶位文坐是出爲崇義軍節度使改鎮遼興卒

韓德源

按遼史韓知古傳知古子匡嗣匡嗣子德源性愚而貪早侍景宗邸及卽位列近侍統和間官崇義興國二軍節度使加檢校太師以賄名後加同政事門下平章事遙攝保寧軍節度使乾亨初卒

韓德凝

按遼史韓知古傳知古子匡嗣匡嗣子德凝謙遜廉謹保寧中遷護軍司徒開泰中累遷護衛太保都宮使崇義軍節度使移鎮廣德秩滿部民請留從之改西南面招討使党項隆益答叛平之遷大

同軍節度使卒於官子郭三終天德軍節度使孫高家奴終南院宣徽使高十終遼興軍節度使

宋 韓倫

按宋史韓令坤傳令坤父倫少以勇敢隸成德軍兵籍累遷徐州下邳鎮將兼守禦指揮使世宗以令坤貴擢陳州行軍司馬及令坤領陳州徙倫許州罷職復居宛丘多以不法干郡政私酤求市利掊斂民財公私患之頃城民武郁詣闕訴其事命殿中侍御史率汀按之倫詐報汀云被詔赴闕汀奏之世宗怒追劾具狀法當棄市令坤泣請於世宗遂免死流海島顯德六年爲左驍衛中郎將遷左監門衛將軍宋初拜磁州刺史轉亳州團練使乾德四年改本州防禦使卒

韓重贇

按宋史韓重贇傳重贇磁州武安人少以武勇隸周太祖麾下廣順初補左班殿直副都知從世宗戰高平以功遷鐵騎指揮使從征淮南先登中流矢轉都虞候俄遷控鶴軍都指揮使領虔州刺史宋初以翊戴功爲龍捷左廂都校領永州防禦使從征澤潞還命爲侍衛馬步軍都指揮使領江寧軍節度討李重進爲行營馬步軍都虞候建隆二年改殿前都指揮使領義成軍節度三年築皇城

東北隅且令有司繪洛陽宮殿按圖修之命重贊董其役乾德四年太祖郊祀以爲儀仗都部署時有譖重贊私取親兵爲腹心者太祖怒欲誅之趙普諫重贊得不誅五年出爲彰德軍節度開寶二年太祖征太原命爲北面都部署重贊令軍士銜枚夜發遇契丹兵於定州大破其衆獲馬數百匹太祖大喜優詔褒美七年卒贈侍中

韓令坤

按宋史韓令坤傳令坤磁州武安人少隸周祖帳下廣順初歷鐵騎散員都虞候控鶴右第一軍都校領和州刺史世宗卽位授殿前都虞候俄賞高平之功爲龍捷左廂都虞候領容州團練使進本廂都指揮使領泗州防禦使征太原爲行營前軍馬軍都校未幾爲侍衛馬軍都指揮使領定武軍節度世宗命宰相李穀征淮南俾令坤從穀退保正陽爲吳人所乘令坤與宣祖李重進合兵擊之大敗吳人世宗親征聞揚州無備遣令坤及白延遇等襲之令坤令延遇以精騎數百遲明馳入城中不之覺令坤繼至撫之民皆按堵遂以令坤知州事世宗命向拱爲緣江招討使以令坤副之下壽州歸朝加檢校太尉領鎮安軍節度使世宗復幸淮右次楚州遣令坤率兵先入揚州命權知軍

府事揚州城爲吳人所毀詔發丁壯別築新城命坤爲修城都部署六年世宗將北征命率龍捷虎捷驍武兵先赴大名又副王晏爲益津關一路都部署俄爲霸州都部署率所部兵戍之恭帝卽位加檢校太尉侍衛馬步軍都虞候冬詔防北邊宋初移領天平軍加侍衛馬步軍都指揮使同平章事太祖親征李筠詔令坤率兵屯河陽及澤潞平還京以功加兼侍中又從討李重進建隆二年改成德軍節度充北面緣邊兵馬都部署乾德六年疽發背卒年四十六太祖素服發哀於講武殿錄其子慶朝爲閑廐使慶雄爲閑廐副使令坤有才略識治道與太祖同事周室情好親密鎮常山凡七年北邊以寧聞其卒甚悼惜之

韓溥

按宋史韓溥傳溥京兆長安人唐相休之裔孫少俊敏善屬文周顯德初舉進士累遷歷使府開寶三年自靜難軍掌書記召爲監察御史三遷至庫部員外郎知華州同判靈州再轉司門郎中淳化二年被病表請辭職尋醫許之溥博學善持論詳練臺閣故事多知唐朝氏族與人談亶亶然可聽號爲近世肉譜摺紳頗推重之尤善筆札人多藏其尺牘弟洎亦進士及第

韓崇訓

按宋史韓重贇傳重贇子崇訓字知禮乾德中以廕補供奉官遷西京作坊副使出爲澶州河南北都巡檢使從太宗征河東還以貝冀等州都巡檢使權知麟州雍熙中李繼遷寇夏州崇訓領兵赴援大敗之徙監夏州軍歷知越泉登莫四州徙知威鹵軍改如京使咸平初出知石州二年再知麟州又敗繼遷於城下崇訓由河西徙閩越再移北邊凡二十五年以勞擢西上閤門使邠寧環慶清遠軍都巡檢使徙鎮定高陽關行營鈐轄屯鎮州兼河北都轉運使事移并代鈐轄權知并州從部署張進襲破契丹於定州六年授西方館使樞密都承旨又命爲鎮定高陽馬步軍都鈐轄屯定州景德三年拜檢校太傅大中祥符二年授右龍武軍大將軍領防禦使以本官分司西京卒年五十六崇訓爲人長厚謙畏未嘗忤物子允恭禮賓副使有謀略好學人以爲能世其家云

韓崇業

按宋史韓重贇傳重贇子崇業字繼源以廕補供奉官選尙秦王廷美女雲陽公主授左監門衛將軍駙馬都尉廷美得罪降爲右千牛衛率府率分司西京俄削秩去駙馬之號從貶房陵廷美卒起

爲靜難軍行軍司馬雍熙三年授寧州刺史真宗初入朝咸平四年改左屯衛大將軍領高州團練使五年十月卒年四十一子允升爲內殿承制閤門祇候

韓國華

按宋史韓國華傳國華字光弼相州安陽人太平興國二年舉進士解褐大理評事通判瀘州就遷右贊善大夫代還除彰德軍節度判官遷著作佐郎監察御史雍熙中假太常少卿使高麗時太宗將北征以高麗接遼境屢爲其所侵命齎詔諭之且令發兵西會使還賜緋魚雍熙三年改右拾遺直史館判鼓司登聞院俄充三司開拆推官四年判本司遷左司諫充鹽鐵判官淳化二年契丹請和朝議疑其非實遣國華使河朔以察之既至盡得其詐以聞直昭文館授刑部員外歷判三司勾院復爲鹽鐵判官又爲左計判官尋都判三司賜金紫改兵部員外郎屯田郎中京東轉運使徙陝西路加都官郎中入判大理寺改職方郎中以詳定失中命梁顥代之知河陽潞州轉運使言其善綏輯供億幹辦詔獎之景德中假祕書監使契丹又爲江南巡撫入權開封府判官真宗朝陵魏咸信自曹州召入扈從命國華權州事俄改太常少卿出知泉州大中祥符初遷右諫議大夫四年代

遷至建州卒年五十五賜其子琬出身國華偉儀觀性純直有時譽子琚璩琦並進士及第

韓丕

按宋史韓丕字太簡華州鄭人父杲晉開運中爲曲陽主簿契丹攻城陷沒焉丕幼孤貧有志操太平興國三年舉進士聲名籍甚解褐大理評事通判衡州石熙載薦其文行代還以文學試中書擢著作佐郎直史館未幾改左拾遺八年遷職方員外郎知制誥雍熙初加虞部郎中二年與賈黃中徐鉉同知貢舉丕屬思艱澀及典書命傷於稽緩宰相宋琪性褊急常加督責或申以諧謔丕不能平又舍人王祐以前輩負氣每陵轢面折之丕乃表求外郡出知虢州就改職方郎中端拱初拜右諫議大夫知河陽濠州丕起寒素以冲澹自處不奔競於名宦太宗甚嘉重之淳化二年召入爲翰林學士終以遲鈍不敏於用俄罷職充集賢殿修撰知均州就遷給事中工部侍郎徙金州召還充史館修撰又出知滁州就加禮部大中祥符二年卒丕純厚畏慎似不能言者歷典州郡雖不優於吏事能以清介自持時稱其長者云

韓顯符

按宋史韓顯符傳顯符不知何許人少習三式善察晷辰象補司天監生遷靈臺郎累加司天冬官正顯符專渾天之學淳化初表請造銅渾儀候儀詔給用度俾顯符規度擇匠鑄之至道元年渾儀成於司天監築臺置之賜顯符雜綵五十匹顯符上其法要十卷自是顯符專測渾儀累加春官正又轉太子洗馬大中祥符三年詔顯符擇監官或子孫可以授渾儀法者顯符言長子監生承矩善察躔度次子保章正承規見知算造又主簿杜貽範保章正楊惟德皆可傳其學詔顯符與貽範等參驗之顯符後改殿中丞兼翰林天文六年卒年七十四又詔監丞丁文泰嗣其事焉

韓守英

按宋史韓守英傳守英字德華開封祥符人初爲入內高品遷殿頭久之以西頭供奉官擢入內侍押班遷副都知隨王繼恩招安西川爲先鋒戰於劍門有功遷西京作坊使劍門都監還勾當三班院進入內侍都知歷定州鎮定高陽關并代路兵馬鈐轄契丹圍岢嵐軍守英與鈐轄張志言知府州折惟昌帥所部破賊俄領會州刺史解都知再遷昭宣使復領三班出爲鄜延路都鈐轄徙并代路提舉在京諸司庫務勾當皇城司爲趙德明官告使歷宣政宣慶二使內侍左班都知領獎